

LE MONTAGNE INNAMorate: LEGGENDE ED IMMAGINI
VERZAUBERTE BERGE: SAGEN UND BILDER

“Einst, als es noch...”

“Una volta, quando ancora...”





L cuer y l sas

Testo - Text **Iaco Rigo** - Marebbe/St. Vigil Enneberg (BZ)

Illustrazioni - Illustrationen **Maria Pezzedi** - San Cassiano/St. Kassian (BZ)

“Canche tu as perdù dut l or y dut l amor, pensaraste indò a me”, i ova dit la oma a sia fia.

La oma fova resteda soula. Les sajons passova dant si uedli via, sciche l variol da sas tl florì dla enrosadura. Bonamente fòvel dagnora l medem, sciche les sajons fova dagnora les medemes. Ence la dé y la nuet fova dagnora les medemes - i vegnìvel in ment, ai piesc dl gran sas, can soura i ciarùs dla pluevia che cheriova tres indò danuef formes y figures, can sot a les steiles che jiva, passova y vegniva indò, dut sciche n carillon rodé dal somech y da la speranza.

Chilò su ne ruvova bele da agn plu degun pe y cuer uman, mo na vousci i vegnìvel in ment de audi te valch ona tumia che s'alzova da la val su. Ela ne i jiva nia do, a la vousc, ence sce ala sintiva de audi fora sia fia, tles legezes y tles tristezes. L encherscedun despassòvela con l passé di dis de sia vita, ala l sfregolòva su sciche n pan, plan plan, y l mangiova su. Ala deventova freida sciche l sas.

Spo te chesta seira dl tert auton òvela si piesc pesoc sciche peres. Ala ne fova nia plu bona de i mueve. Ilò sintivelà che la mont fova per s'la tò, che ela fova tl deventé crep.

Y l dé che demè plu l cuer fova uman, sintivelà does mans che l'abraciova. Les leghermes de sia muta tomova sciche pluevia glaciouosa sun si grem. Demè plu l cuer tla oma sintiva l encherscedun y l amor per sia fia che la ova lasceda soula na vita. L sas ne zedova nia a la forza dl cuer - chest ess volù sprizé fora y vegnì indò persona y oma, mo s'enflova y spo tomova adum, sciche n ciampamil de lava.

